

# OLA

PULETINI A'OGA



16 APERILA 2024 ~ Lomiga 2 ~ Upega Tafailagi: www.ola888.com ~ Telefoni: 0210364322 ~ Tuatusi: ola.niupac@gmail.com ~ evaleon.books@gmail.com ~ NIUPAC Publication

## Melegalenuu Ah Sam: Tofa



Faamatalaga itulau e 3



A'E MALO FAIVA: Leali'ie'e Tufulasi Taleni ma lona tuafafine, Laloifi Tonumaipé'a, i le aso o le faau'uga mo lona faailoga Foma'i Tofa Manino i Mataupu Tau A'oga, vaiaso talu ai. O le ulua'i faia'oga Pasefika ua ausia sea matati'a i le UC (University of Canterbury) i Niu Sila. O loo galue Taleni i le iunivesite o se Faia'oga Sinia.

## Faasoa Papaliitele Fasavalu i le Mativa i Samoa

O LE VAIASO NA se'i mavae na fai ai se semina i le potu fono o le Aoa i le laumua Le Papaigalagala, o lona autu o le mativa i Samoa. Sa ta'ita'ia lenei e le Susuga ia Papaliitele Fasavalu, o le matagaluega o Fuainumera Faamaumau a Samoa.

O le folasaga a Papaliitele i le autu Mativa i Samoa, e faavae i faaiuga o se sailiga (sevei) sa faia i le tausaga 2018. O lea sailiga na taula'i ai i tupe maua ma tupe fa'aalu a se aiga i Samoa. O le sini, ina avea se faaiuga e fautuaina ai faiga faavae a le malo, ma malamalama ai i le tulaga o le mativa i tupe atoa le mativa e le aafia ai le tupe.

I le iuga o lona sailiga, na mafai ai e le afaigaluega ona vaevae aiga Samoa i vasega, ma faailoa mai i luma vasega na o loo sili ona afaina. O le faamoemoe, ina faitauina i latou i le faasoa a le tamaoiga i nuu, le malo ma isi vaipanoa o le sosaiete.

O lenei la galuega faasoa na folasia ai e Papaliitele le tulaga o loo iai le atunuu i lenei mataupu e ala i molimau a fuainumera. Na ia faamaonia ai le tulaga faia'e o le mativa (poverty). E tusa i faamaumauga a le matagaluega, ua siitia le aofa'i o i latou i lea vasega, mai le 18.8 pasene i le 2013 i le 22.7 pasene i le 2018. Toe lava o le 4 pasene le siitaga o i latou nei o loo soifua i lalo o le Laina o le Mativa i Mana'oga Faavae.

Sa ta'ua foi e Papaliitele le tulaga siisii i luma o meafaigaluega e su'esue ai aafiaga o le mativa, talu ai e le tutusa uma nuu ma



Le alii faasoa, Papaliitele Fasavalu ma taiulu o le FOBE ma sui o le Laumua sa auai i le semina

atunuu ma o latou aafiaga. O lea ua fa'aaoga ai le meafaigaluega ta'ua o le MPI, e faavae mai ai se meafaigaluega e fetauti mo Samoa lava ia, e tafalasi lana vaai i faafitauli. E manatu ua talafeagai lea mo malo e pei o Samoa e le na o tupe e mativa ai ae mativa foi i 'ai masani o le aso, mativa i avanoa tutusa o le soifuuga. O le fua masani a le lalolagi o lona o tupe mai totogi o galuega. Mo Samoa ma le tele o isi malo tauatia'e, e toatele aiga e le faigaluega i ni galuega totogi.

O le tasi o talanoaga masani e agaia lenei, e faapea e leai se mativa i Samoa, ae e molimau fuainumera, e iai; e le tutusa uma aiga i avanoa

o faamanuiaga. E ese le aiga e nofo lisi i Apia, leai ni tuamaota, ma le aiga e nonofo i Salafai poo Falealili; e galulue nisi ma ma'ele'elega i ala e atia'e ai aua e iai fanua e tua i ai.

O le mativa e aafia ai le le avanoa i foma'i, ma a'oga, le vai ma le paoa. O mana'oga faavae na e ao i soo se tagata soifua ona avanoa i ai.

I le tulaga i a'oga, e to'afia aiga e le nafatia le totogi o pili o a'oga a le fanau, e to'afia aiga o loo faamalositia le tuua o Samoa e saili manuia i fafo ona o le mativa.

Na iloa le 'anoa o faasoa i lenei faatofala'iga sa auai taiulu o le FOBE ma sui mai saofa'iga eese o le Laumua.

TALA A'OGA I LOU VAIFANUA:

# Faitau selau e le i totogia pili a'oga iunivesite

E 838 le aofa'i o alii ma tamaitai a'oga i le Iunivesite Aoao a Samoa, na tala'ia i le le totogia o o latou pili a'oga, ma e ono afaina ai se iuga o a latou taumafaiga. O le taunuuga faigata, o le toesea o o latou lesitala.

Tainane ni taumafaiga a le pulega, e faaopopo aso e faagata ai, ma ofoina foi tuutuuga o le togitogi vaega, e iai ma le toesea o se faasalaga mo pili e tuai totogi, a ua le faasaoina ai le tulaga e pei ona tula'i mai nei.

Ona ua le maualafia le iunivesite, o lea ua manatu ai le pulega e fua se tapu, e iai le aveesea o le avanoa o i latou nei i le Moodle, o loo avanoa uma i ai tama ma teine a'oga.

O le Aso Faraile, 12 o Aperila na faagata ai le avanoa mo i latou ma o latou matua e asia ai le Ofisa o Tupe a le a'oga, e faia ni maliega o le togitogi vaega o latou pili. O sea maliega e aofia ai le togiina atu o se vaega e amata ai. E foliga e lei fa'aaogaina lea avanoa, ma faapea foi ona toe tuuavanoa ai le a'oga i le Aso Gafua, 15 Aperila.

Na fesiligia le pulega, ma o la latou tali, e pule le a'oga i le faaiuga e fai, e ave ese ai le lesitala o i latou e lei utagia le faasililaga. O le Aso Faraile 22 o Mati 2024, na togia o le aso e faagata ai le togiga o pili a'oga, peita'i na iloa le le maausia o lena fuafuaga mo le to'atele.

Na atagia i faanoi a le a'ua'ooga le le mafaia e aiga ona totogi o latou pili, ma o na aiga sa tuu o latou faamoemoega i le tufatufaga o miliona a itumalo i le poloketi miliona a le malo. Ua iloa, e le o itumalo uma o loo ofoina



atu sea faamanuiaga ia latou tama ma teine a'oga o loo a'oga i le iunivesite.

E 51 itumalo palota a Samoa o loo avanoa i lea ofo a le malo. E tolu ni itumalo ua faailoa lo latou sauni e totogi pili o fanau o loo a'oga i Le Papaigalagala.

Ae le o tagata uma e avanoa i ai. O se tamaitai faia'oga mai Vaimauga sa molimau i le te'ena o lana talosaga e le komiti o loo lufilufia le miliona a la latou itumalo. O le tala ane, e le faitauina faia'oga ma i latou na o loo faigaluega.

O le ta'utinoga a Vela (e le o lona suafa moni lea), e tatau ona taga'i le komiti i le ata lapo'a ae le i se faaupuga. O le faaupuga e faapea o loo faigaluega e le aiga; aua o nisi e laiti totogi ae tele mea e fai i le aiga ma le nuu. A o lenei

fesoasoani mo faia'oga o se faamama avega ma se inivesi mo le lumana'i o Samoa. O lana tala, e matua fia a'oga lava, a ua avea le pili a'oga ma faalavelave i lona agaga naunau. O lea foi ua sauni e faamavae mai i ana mataupu sa ave, ona ua le maua lava se fesoasoani.

O lenei faafitauli taua'oga o Vela e atagia ai le tulaga o loo feagai ma se vaega o aiga e a'oga a latou fanau i le iunivesite ma nisi a'oga o le tapulaa lona tolu. Aemaise i nei taimi o le siisii o le tau o oloa, ma le vao lu'itau e feagai ma aiga.

E talitonu le pulega a le Iunivesite o loo tuuavanoa pea le a'oga, ae i le iuga o le aso, e iai le tiute o le pulega i le malo ma Samoa, mo le sologa lelei o le a'oga, ae e malamalama lelei i faafitauli o nisi o fanau o loo aafia.

- OLA Faatonu, Ata Samoa Observer

# Faamama avega le lotu mo fanau

I LENEI VAITAU le mautonu mo nisi o fanau i Samoa, faapito le faatatau i nuu pei o Leauvaa, ma le loaloa o aai tulata i Apia, i le feagai ai ma lu'itau o le tau o le soifuaga, ma tulaga le ma'alofia ua afaina ai le sologa masani o mea, e iloga le tali atu a nisi o lotu ma faalapotopotoga lave'i i o latou mafatiaga.

O le masina na se'i mavae na afea ai le afioaga o Leauvaa e sui o le ekalesia Aso Fitu, e tauaao ni faamomoli o meataumafa. O meaalofo e pei o taga suka, araisa, mea'ai tuuapa, mea fai mea'ai. E le o po se lilo i le tulaga o nisi o aiga Leauvaa o loo feagai ma faigata, ona o vesiga faalelotoifale ua silafia.

O mafatiaga o loo feagai ma nei aiga e aofia ai le fofoga taumafa, ina ua faatama'ia a latou faato'aga ma mea aoga. Ae sili ona afaina fanau iti ona o le ogaoga o suiga. E le gata i le tausiga i le tino ae o lagona ma mafaufau o le fanau. To'atele ua fesilisili pe iai se mea leaga e tupu.

O lea fesoasoani mai le ekalesia na saunoa faafetai i ai lo la to'alua ia Tevaga ma Vaifale, aua le paia i le aiga Satuala. O se faamama avega na talisapaia faatuaelele.



O le vaiaso na se'i tuana'i na to'ia ai le tautua a le Goshen Trust (Kosena) (ata) i le tufa a le ekalesia, i ni faamomoli o meaalofo mai ana aulotu e afua mai Anoamaa e aulia Vaimauga.

O meaalofo taumafa e pei o taga suka, araisa, mea'ai tuuapa, le vao o oloa eseese sa aao I ai nei aulotu, na tauaaoina atu aua le fofoga taumafa a e o loo ia tausiga. Ua atoa ai le 14

tausaga o le polokalame leni a le ekalesia.

O le Goshen Trust, e nafa ma le tausiga o e gasegase i le mafaufau, o se tautua muamua i Samoa e tausi ana gasegase i totonu o le lotoa. E le o se pisinisi ma e faamoemoe lona tausiga i le agalelei o le mamalu lautele.

Mai le amataga, sa aga'i le tautua a le ekalesia i le Mapuifagalele, ae i leni tausaga ua ave foi le faamua i isi tautua.

TALA A’OGA VAIFANUA O AOTEAROA:

# To’atele e manatua le tautua a Melegalenuu Ah Sam

O le sui pule o le Kolisi a Magele, Melegalenuu To’alepaiali’i Ah Sam, ua tuua le mafutaga mo le taimi mulimuli. O le aso 15 Aperila 2024, na maliu filemu ai i lona aiga i Aukilani, ma na vave ona fa’aalia le agaga faanoanoa ma le faavauvau i aiga, uo, ma ‘aumea i le galuega, ina ua maua le tala.

O le tautua a Ah Sam i le matafaioi o a’oga ua silafia lava e le to’atele, afua mai i Samoa, sa galue ai i kolisi a le malo, e aofia ai le Kolisi a Samoa a o pule Albert Wendt ( Le Afioga ia Maualaivao), malaga atu foi i Aotearoa ma fa’aaau ai le tautua.

Sa galue i le kolisi a Otahuhu mo ni tausaga sosoo ai le kolisi a Magele sa galue ai o le faia’oga, pule lagolago ma le sui pule e aulia mai le aso na tuumalo ai.

O lona faamamaluina i le faailoga New Zealand Order of Merits, i le 2022, e fa’ailoa ai lana tautua i le atina’e o tagata Pasefika i Aotearoa. Afua mai i tausaga 70 ma le 80, le tapenaga o le silapasi a’oga i le gagana Samoa, sa lotolotoi ai le faia’oga i lona tauavameaina i totonu o le Kolisi o Magele.

Sa faailoa foi lona sao i le faaofia o le gagana a le Atu Kuki ae faapea le faka-Toga, e avea ma isi gagana fou e a’oa’oina e fanau a Magele i lana kolisi.

Ua silafia fo’i lona sao i le faaolaolaina o tu ma aga faafiafia a tagata o atumotu. Mai le tele o tausaga, o ia le tasi faatonu o le malae faafiafia a Samoa i le Polyfest.

O le Polyfest ua avea nei ma se tauaofiaga pito to’atele i lenei itulagi, avea ma se sauniga e

faapotopotoina kolisi e tele ma atia’e ai sootaga lelei i va o fanau, ui ina eseese aganuu.

O le susuga i le faia’oga e afua mai i le afioaga o Satapuala, sa faafailele ai i le gagana ma le aganuu i lona aiga ma le nuu. A’oa’oina lava i a’oga i Samoa, maua foi se sikolasipi a’oga e malaga mai ai e faalatele le silafia i le galuega faafaia’oga.

O ona matua o ni e sa tautua foi i le malo o Samoa, o le tina o se tausima’i pasi o le soifua maloloina, o lona tamā o se tasi faamasino i le faamasinoga o Fanua ma Suafa.

E molimau ana pa’aga faigaluega i se ta’ita’i lototele ma se faaa’oa’o lelei mo ta’ita’i talavou Pasefika.

A o soifua, na ta’ua e Mele ona matua o ana faaa’oa’o sili i le olaga tauivi ae faapea le tu ma



le aga faaSamoa. O le a manatua o ia e le to’atele o fanau sa ia a’oa’oina i Magele ma Otahuhu fo’i. O le a misia foi lona auai i le Polyfest sa tautua ai i tausaga e tele.

Ua tuua e ia le tamā o le aiga, le tofa ia Ulugia Lote Ah Sam ma le nofoaalo.

## E TAUA LOU SOIFUA MALOLOINA

O le taugologo fai pea a foma’i. E matua moomia ai le va’ai o lau foma’i a o sauni atu mo ni sauniga poo ni tapenaga, ma faapea foi pe a mae’a, tusa pe manatu o loo e malosi. **Lagolagoina lenei fe’au e le AH LEONG CLINIC**

### NIUPAC

Email: [evaleon.books@gmail.com](mailto:evaleon.books@gmail.com)  
 Phone: (09) 269-6186  
 Postal: Apia

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

**Editorial Team**

Levi Tavita PhD ~ [ltavita8@gmail.com](mailto:ltavita8@gmail.com)  
 Muliagatele V. Fetui PhD ~ [v.fetui@auckland.ac.nz](mailto:v.fetui@auckland.ac.nz)  
 Salā Saili Aukuso PhD ~ [saili.niupac@gmail.com](mailto:saili.niupac@gmail.com)

### EVALEON BOOKS &

### NIUPAC PUBLISHING


Telefoni (09) 269-6186. Emeli: [evaleon.books@gmail.com](mailto:evaleon.books@gmail.com)

**Tautua e ala i le gaosia o alaga’oa mo a’oga (tusi mo le a’oa’oina o le faitau i le gagana Samoa, tusi e a’oa’o ai gagana, kalena, posters, yearbooks, brochures). E tautua fo’i i le fa’aliliuga o gagana, ma le tapenaina o ni tusi e fia lomina i so’o se sionara o fatuga.**

**Sponsors:**

*New Zealand  
 Lottery Commission*

*Evaleon Books &  
 Niupac Publishing*



*Faasoa o le Vaiaso: Lau lau faatonu OLA*

## O le ola o le taulaga, a le ofoina atu e maumau

E fiafia e toe faatalofa atu i le mamalu o le aufaitau a le tatou puletini i leni taeao. Malo le lagi e mama ma le soifua maua. Viia pea lo tatou Matai Sili i lana tausiga.

I le Aso Tofi o lumana'i, 25 Aperila 2015, e faamanatu ai le atoaga o le 109 tausaga talu ona tulaueleele fitafita a Niu Sila ma Ausetalia i laufanua o Kalipoli (Gallipoli), ina ua tago'au le lalolagi i lana uluai taua.

E 103,000 fitafita a Niu Sila na auina i le taua (10 pasene o lona faitau aofai) e aofia ai Maori e 2227, o uso mai Niue, Atu Kuki, Kiripati, Fiti, To'elau, Toga, Samoa, e 458 lo latou aofa'i.

E sili a'e i le 2700 na maliliu i le kemupeni i Kalipoli. Ae 12,500 na feoti i isi tafa o le taua. A aofa'i, e 18,500 na maliliu, ae 50,000 na manunu'a.

E 16 miliona na fano i leni taua a le lalolagi, aofia ai ma tagatanuu lautele; 10 miliona na manunu'a, atoa e na maliliu i le faama'i, a tuufaatasi e 37 miliona. E finau isi e lata lava i le 50. E leai se vaipanoa o le lalolagi na sao i aafiaga o le taua, e le gata i le taimi na tupu ai ae faapea foi lona iuga, ina ua taape ma fo'i atu fitafita ma le siama o le Fulu Sepania na tupu mai ai, lea na sili lona mata'utia i lo le taua lava ia. Na o'o atu le faama'i i tulu'iga o le kelope, i motu o le Pasefika i saute.

Na o'o i le pole malulu i Matu i tagata Esikimo e nonofo ai. Mo Samoa, e le o se tama'i afaina, toe o le kuata o lona faitau aofa'i na avea.

O le kemupeni i Kalipoli e sili lona taua mo malo o le ANZAC e taulamua ai Ausetalia ma Niu Sila. Auā o le nofoaga tonu lea na mua'i aga'i i ai la latou fe'au i le taua faasaga i le fili.

E molimau le autusitala o taua, tasi leni kemupeni aupito pa'ū lona tulaga i tala o kemupeni o taua i le tala faasolo. E faailoa ai le malapaga o le ta'ita'iga a taitai'au Peretania sa taiulu, molimau le tele o ola na maumau ona o lape o le ta'ita'iga.

Ui lava i lea, e le o le autu lea o le aso faamanatu o se kemupeni faia'ina. Peita'i o mea taua na afua mai ai i lea 'ala iloga ma tupito o le tala faasolo. Auā na afuafua ai le agaga lotonuu mo tagatanuu Niu Sila ma Ausetalia foi.

Ua togo malama se ata o ni foliga fou mo le taimi muamua, e iloa atu ai i latou i se ata e ese mai. Na avea foi le kemupeni ma ala o le agaga pulunaunau mo se vavaega tuma'oti mai ia Peretania sa faalagolago i ai i o la upufai ma le tamaoiga.

Mo malo Pasefika sa auai, o Kalipoli na faitaulia ai so latou sao faavaomalo mo le taimi muamua. E tatau ai ona mitamita Samoa ma malo Pasefika i se sao a a latou fitafita, pe a talanoa i tiute ma osigataulaga i le toto.

A talanoa i le lotonuu faaNiu Sila, e sili ona felata'i lagona o Maori, Papalagi, ma le Pasefika e ala i le ANZAC, i lo le Feagaiga i Waitangi ma nisi feagaiga.

E iai le manatu i nisi e faapea o le taua muamua o se vevesi e patino i malo Europa ma

politiki Europa. E moni, ae le mafai ona fa'aaoga pea lena o se faano'i i nei aso e 'alofia ai sona le faatauaina o lea itula taua ia Niu Sila ma Ausetalia. Auā o Niu Sila o le uo, o Ausetalia o le pa'aga. E moni e a le uga e tausili (malo pule Europa) ae tigaina ai le atigi (nuu kolone), ae le to'esea ai le moni o le agaga na finau ai i le manatu e sili (ideal), ia te'ena pulega sauai i le lalolagi.

E moni foi o leni Aso Faamanatu e foliga e faapito i le na o papalagi ma e tau i ai, pe iai sina manatu e ono tineia atoa ai le uiga faailogalanu i le va o le papa'e ma isi—e leai; ae le avea ai le 'ai o nuu laiti a le Pasefika e ao ina fa'aaliali i luga.

Mo Samoa lava ia, e le tatau ona luagia se lagona ona o na mafuaaga, ae mafua ona faamanatu ona o le maua luga o lana taulaga sa ofoina. O le taulaga a Samoa e lei gata ai i ana fitafita na auina atu, ae faitau ai ma le kuata o lona faitau aofa'i na maliliu i le Faama'i. O le taulaga atoa lena a Samoa.

E mafai ona faapea atu e iloga le sootaga malosi o lena mea na tupu ma lana finau maua'i ia toe maua mai lona sa'olotoga.

I leni foi vaimasina ua tatou faamavae atu ai i nisi o faifaiva o le ola, ia latou taleni ma meaalofa, avea ai i latou o ni faia'oga i le mafaufau ma le lotu. Muamua, le afioga ia Tuisugaletau Aveau Sofara (fatupese), le afioga ia Fuimaono Na'oi'a (tusiupu gagana Samoa), le tofa ia Fata Lafi Esera (faia'oga), ma le susuga ia Melegalenuu Ah Sam (faia'oga). Ma isi foi ua le maua i le ripoti.

O i latou sa tofua ma le taulaga e ofoina mo Samoa e ala i o latou tomai ma agavaa sa faasoa atu. A o tatou sauni atu e faamanatu le taulaga toto a fitafita Samoa ma le lalolagi i lena vaiaso, e manatua ma le faafetai le meaalofa a le Atua ia i tatou, i le mafaia e tu ma tepa i tua, ma tomanatu loloto i le uiga o mea e tutupu; e iai na upu o augatausaga: "i le goto ifo o le la ma i le taeao, tatou te manatua i latou."

Aisea e manatua ai pea, aua e taua le taulaga sa latou ofoina. E pei o le autu o le tatou faasoa, o le ola o le taulaga, a le ofoina atu e maumau.



TALA A'OGA MAI AOTEAROA



## O suiga e lima mo a'oga a Niu Sila

O NI SUIGA iloga i totonu o a'oga a Niu Sila sa laualuga i folafolaga a le Itu Agai, National, Act ma le NZ First, ua amata ona tino mai nei i lalo o ni mataupu se lima:

### Lafoa'i taiala mataupu le ta'ua

Muamua, lafoa'i taiala mo a'oga i faigauo ma mataupu o le va e le ta'ua (sexuality). O le NZ First na ia folafola lona lafoa'iina o nei pe afai e tula'i mai i le itu malo. Na ta'ua e lona ta'ita'i Winston Peters, le tatau ona aveese lea a'oga faakenera mai totonu o le ta'iala. O le tasi o maliega i le va o le NZ First ma le National e aofia ai lea folafolaga. O le toesea o nei taiala ua laga ai le fesili poo le a le mea e sui pe faatumu ai. Na fa'aalia foi ni faatioga, e iai lena a le na tapenaina, Polofesa Katie Fitzpatrick, na ia ta'ua leni o se faaiuga o aso anamuā.

### Vaioa le faa'oga o telefoni i a'oga

O le taofia o telefoni mai lotoa a'oga o se tasi o folafolaga a le National, e faavae i le taofi o lona ta'ita'i, e avea ma faalavelave i le taula'iga a le fanau i mea'a'oga. O le tuutuuga e faapea, e na o mea taua'oga ma le ola maloloina e avanoa ai le fa'aaogaga, ae pule le a'oga i lana auala e faamamalu ai le vavao. I le faiga na sau ai, e pule le a'oga i lana lava faiga faavae.

### Toe foi mai A'oga Siata

O le toe fagua o A'oga Siata (Charter Schools) e faafetaia ai le sui palemia faaolioli, David Seymour, o se tasi lea mataupu na tu'imaui ina ua finagalo e auai ma le National i le malo soofaatasi. O a'oga nei na lafoa'i e le Leipa i le 2018 ina ua tumalo. O a'oga siata e faatupe e le malo, e pule latou ia latou taiala (curriculum) ma totogi o faia'oga.

### Itula mo le literasi

Afua mai i le amataga o le 2024 o le a faamalosi ai le a'oa'oina o fanau i le faitau ma le tusitusi atoa le Numera. E tasi le itula mo lea galuega. E talitonu le National o le tali lea i le i le fai ifo o le tulaga o le faitau ma le tusitusi ua iloa i su'esu'ega. E faapena foi i le Numera. O leni folafolaga sa ogatotonu i le kemupeni a le National mo a'oga. E lua ni su'ega e faia i le faitau, tusitusi, numera ma le saienisi mo fanau mai le tausaga 3 e aulia le 8.

### Suiga i le ta'iala o le talafaasolo o Niu Sila

O le suiga e lima a'i o lena o suiga i le taiala o le talafaasolo o Niu Sila. O le finau a le Act, e tatau ona faafoisia le paleni o le talafaasolo o Niu Sila i lona taiala.

O suiga na faia e le Leipa i le 2023 na avatu ai le faataua i tala a tagata Pasefika ma Maori. O ni suiga o le a toe tilofia e le malo fou ma fai i ai ni a latou foi suiga. O le finau a le Act, ua mamafa le taiala i pulega faakolone ma tulei ai talanoaga o le polotiki itu i ama (left wing).

# Ne'i Mea Ane ua Galo

## Tusiupu a George B. Milner ua 58 tausaga o lana tautua

**O**LE vaimasina tonu lenei o Aperila 1966 na tatala ai le galuega a le alii foma'i, Dr George B. Milner (ata) mo le fa'aogaina e a'oga a le atunuu. O le Samoan Dictionary o le tusiupu muamua lea na poloa'iina e le malo lona tapenaina. E tulagaese fo'i aua o se faiga pa'aga ma le malo Amerika Samoa, na avanoa ai le alii su'esu'e e asia fo'i Samoa i sasa'e ma faapea ona tumati'e ai lona amana'ia o le galuega ia Samoa e lua.



Dr. George B. Milner

I se sauniga sa faia i le Faletusi Faamanatu a Nelesoni, sa tatalaina ai le galuega e le alii palemia, Fiamē Mata'afa, na faafetaia le fitaituga o le sa nafa ma le tiute. Ae faapea fo'i sui o le atunuu sa taupule faatasi ma faisao fo'i i le tapenaga.

Faapito le faamalo i le ao sofofaatasi, Tupua Tamasese Meaole ma Malietoa Tanumafili le II sa tapua'i faiva.

O le tala o le galuega e afua mai i le mana'oga, ina ua iloa e ta'ita'i o Samoa le taua o se tusiupu e tua i ai faia'oga ma fanau i le atina'e o a'oga. Ua maua le tuto'atasi ae tele vaega e fia faaleleia. O a'oga o le poutu lea o soo se atina'e o se atunuu. Na mafua ai ona faama'ite le talosaga i le iunivesite a Lonetona, ma auina mai ai le alii su'esu'e.

E to'aono ni sui na togia e lagolagoina le tufuga, ma laga'ia ai le fe'au mai i le 1955; amata i le motu o Savaii, ma asia fo'i Tutuila. Na mae'a ona ao upu ona talia atu lea o Milner i Lonetona mo le tuufaatasiga. Na fo'i mai i Samoa i le 1959 e faamausali le faata'otoga ua iai. E aulia atu le 1961 ua sauni mo le lomiga o le ata muamua.

Sa ta'ua le ma'elegā o le alii i le faatinoga o le fe'au, tele taimi na fa'aalu i nuu ma aiga e faalogo i leo o tagata, ina ia maua le atoaga o se upu i lona tusiga ae faapea fo'i le uiga. Sa auai fo'i i fonofono a nuu, o faiga faiva ma galuega masani, ina ia maua le sini o se galuega tapena lelei.

E le pine e molimau le 10 tausaga o lona tapenaga mae'ae'a, o loo avefa'apea lana galuega ma toomaga mo a'oga ma su'esu'ega e o'o mai i lenei taimi.


I luma atu Misi Parate, sa aoga tele i ona taimi, aemaise le faamauina o upu o le gagana a tua'a anamua, peita'i na iloa lona le lavatia tauave le fe'au fa'aauau. Mai le tusi a Parate e aulia le galuega a Milner e 104 tausaga le va. Mai ia Milner e aulia le asō ua 58 tausaga. A aofa'i ua 162 tausaga o le tautua a nei alii ma a laua galuega mo le Gagana a Samoa.

Mai ia Milner, e iai ni isi taulagalaga i tusiupu e taumafai e faatumu le ava o tausaga e 58. Aemaise o le mana'oga mo ni upu fou e fua i le saosaoa o le atina'e o gagana e pei o le faa-Peretania o loo vaavaalua ma la tatou gagana.



| ~ APERILA 17-30 ~ |   |
|-------------------|---|
| 17                | 1987 Ulua'i malaga Samoa Air va o Tutuila ma Apia   |
|                   | 1973 Taunuu i Apia palemia a Niu Sila, Norman Kirk  |
|                   | 1900 Sisi i Fagatogo le fu'a a le malo Amerika  |
| 18                | 1931 Suitulaga Hart (Ata) ia S. Allen (Aleni)   |
| 19                | 2014 Malia fatusolo Lemalu Tate Simi  |
|                   | 1909 Tuuvaa ese Lauaki Namulauulu Mamoe ma ni ta'ita'i se to'aiva o le Mau, o latou aiga ma se faifeau, 72 le aofa'i, i le Atua Mariana e fa'aaunu'ua ai. |
| 20                | 2001 Tuua le malo e Vaai Kolone, le sa palemia ma le sui o le Fono a sui Tofia  |
|                   | 1942 Amata galuega fausia o le malaevaalele i Faleolo   |
| 21                | 1972 Tatala Faleolo i lona toe faafouga   |
|                   | 1881 Maliega i le va o Titimaea ma Iosefo e faasolo le tofiga o le tupu ia i la'ua, ta'i lua tausaga ma sui.  |
|                   | 1844 Faavae le lotoa a'oga a le LMS i Malua   |
| 22                | 1961 Uluai fonotaga a ta'ita'i lotu Pasefika i Samoa i Malua  |
| 23                | 1994 NZT. Malo le Manu Samoa ia Aukilani i Eden Park, 15-13   |
|                   | 1892 Faaulufale malumalu Katoliko a Leulumoega  |
| 24                | 1960 Faalealea le tagavai (fu'a) a Amerika Samoa  |
| 25                | 1916 Tapunia uma pisinisi a tagata Siamani i Samoa e le malo fou  |
|                   | 1915 Auai atu fitafita Samoa i le taua 1 a le lalolagi; ulufale o ni fitafita a Niu Sila  |
| 26                | 1996 Faiga Palota, tumalo HRPP 24 nofoa, SNDP 11, Liberal 1, Independents 13  |
|                   | 1893 Sisi le fu'a o le malo Mata'afa i Malie  |
| 27                | 1978 Pa'u vaalele SPIA i luga o le mauga o Fito, 10 pasese maliliu, o se aiga   |
| 29                | 2017 Leiloa i le Tosua i Lotofaga se alii Samoa, fitafita o le sami a Niu Sila  |
|                   | 1889 Feiloa'i sui o malo pule e tolu i Siamani malilie i se malo i lalo o Malietoa Laupepa  |
| 30                | 1915 Taunuu se vaega'au e 360 fitafita mai Niu Sila   |

O Dr Milner sa faia'oga i le lunivesite a Lonetona, o lana mataupu o gagana a tagata Asia ma le Pasefika, sa galue fo'i i le tuufaatasia o se tusi kalama a le malo Fiti, ma isi fo'i fe'au i nuu a le Pasefika, e aofia ai ni pepa sa ia tusia i le kalama o le gagana Samoa. Na malia Dr Milner i lona aiga i Egelani i le aso 7 Iulai, 2012, aulia lona 93 tausaga.



### Aperila i le Tala Faasolopito o Niu Sila

- 24 Aperila 1951 Malia ulua'i fitafita a Niu Sila i le taua i le peninsula a Korea
- 25 Aperila 1915 Osofa'iga o Kalipoli e fitafita a Niu Sila

### EVALEON BOOKS NIUPAC PUBLISHING

Telefoni 76 65629 e-meli: evaleon.books@gmail.com

*Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomia i so'o se sionara o fatuga.*

TALA LATA MAI O LE POROKETI TOESE O VAIMEA

## SE TALA LATA MAI O LE POROKETI: TOESE O VAIMEA



**SO'O SE** tala faumalo e ta'u ai pulega faakolone i le lalolagi, e

tatau ona o'oo'o lona auililiga, i nofoaga na sa faatino ai a latou pulega saua i tagata nofo to'ilalo.

Mo Samoa i lalo o Siamani, e lagona lelei atu le si'uleo 'Vaimea (Prison), poo le Toese o Vaimea, aemaise le 'aumatutua sa vaai pe faalogo fo'i i na tala mai o latou matua.

Mo le to'atele, e maua lena sootaga i potua'oga ma su'esu'ega a le 'ausu'esu'e i molimau vaia o toega o mea o iai.

I lana fonotaga o le masina o Aperila na logoina ai le fono a le CSS i se tala lata mai o le Poroketi Vaimea Prison, e le taiulu o le poroketi, Dr Dionne Fonoti.

Na saunoa Dr Dionne e faamautinoa le tala fiafia, ua lamalama faai'u le galuega, ma ua iai le faamoemoe e tatala aloa'ia e feagai ma le Tuto'atasi ia Iuni. Ae mo le faataunuaina, e faamoemoe i le talia o le talosaga mo se seleni e faatino ai.

O lenei poroketi na afuafua mai i le tausaga talu ai, ina ua maua se tupe e faagaoioi ai.

E pei ona folasia i lena taimi, o lona sini, ia faamaumau le tala o lenei nofoaga i upu ma ata ma auala faatekonolosi faaonaponei, aua le mau a Samoa mo tupulaga lalovaoa. Na ta'ua e Dr Dionne i lena taimi le taua o tala ta'itasi i pagota sa ulufale, o leoleo sa galulue, ma ofisa eseese a le malo sa nafa ma le tausiga o lenei toese.

Mai lena taimi, na avea le nofoaga ma falea'oga mo nisi o vasega a le Laumua o Mataupu Tau Samoa (CSS), i tama ma teine a'oga o loo ave mataupu i le akieolosi poo tala'eli a Samoa.


I na vasega, e saili le molimau vaia o mea tino mai ma upu sa faamaumau e le 'au fairipoti o le taimi. Ta'ua foi le tele o mea fou e lei faamaumauina, mai molimau o toega mea, o le a faailoa i le ripoti faaiu a le Poroketi.

Saunoa Dr Dionne i le sootaga taua o le Toese o Vaimea ma le afuafuaga o le Mau o le Tuto'atasi.

Molimau le talafaasolo, o Vaimea na



Toese Vaimea avea ma 'auga o se su'esu'ega a le Nofoaga Tutotonu o Su'esu'ega tau Mataupu Samoa Le Papaigalagala



O ni pagota ta'uta'ua o Vaimea e iai Lauaki Namulauulu Mamoe, Taisi Nelesoni, ma Tuimalealiifano Siuaana.

saga faamalosiā ai le agaga finafinau ma le lotonuu o ta'ita'i o le Mau.

Amata ia Lauaki Namulauulu o le Mau a Pule, ma fa'aaauu mai ai i lalo o pulega a Niu Sila.

O Vaimea o le taunuuga mo soo se tasi e soli le tulafono, o le igoa faamata'u i na ona po o pulega faakolone.

Tusa i faamau, na faalava'au ai ni pagota a le malo i taimi o Siamani ae faapea foi pulega a Niu Sila. I le 1928 na faasala ai i le oti se alii Saina, Ah Mau le suafa, ma le 1952 na faia ai o lea foi mo se alii Samoa, Faasee Faagase, i lona fasiotia o lona to'alua. O Faase'e le toe pagota na faasala e ala i lea auala (faalava'au).

O le tasi igoa sa faaigoa ai Vaimea o le Pa Apa, e mafua i le puipui sa si'omia ai le



Dr. Dionne Fonoti

lotoa, e foliga e nana mai tagata mea o loo faia i totonu.

O isi galuega a pagota e aofia ai le faamamaina o le auala tele a le malo, ma soo se galuega leipa. Faamauina foi le fa'aaogaina o i latou i taimi o le faama'i tele e aoina tino maliliu, ma faapea ona pisia ma maliliu ai nisi.

Na tula'i mai Vaimea o se nofoaga ta'uta'ua i taimi o le Mau, e faafalevale ai ni isi o ta'ita'i iloga o le Mau, ta'ua le suafa o Taisi Nelesoni, Tupua Tamasese, Faumuina Mulinuu, ma Tuimalealiifano Siuaana.

Ta'ua e Dr Dionne, o lenei galuega faamaumau o le a manino ai le tele o fesili sa lei mafai ona taliina ona o le 'ailililo o lona lotoifale i na augatausaga.

O le fesili faigata, Pe iai se lumana'i o Vaimea? O se fesili o loo talia se tali mai le malo, ae e to'atele e talitonu e tatau ona fai se galuega laved'i, pei foi ona faia o lea i le tele o nofoaga faapea i le lalolagi. Mo Samoa, e iloga le igoa Vaimea ma le tala i le afuafua mai o le finau a Samoa mo lona tuto'atasi.

**UILI FAU UPU**

Saili tali o fesili o lo’o i lalo. Pule oe pe sipela i luma (clockwise) po’o tua (anticlockwise).

E sa le feosoosofa’i.

1. Tusi mai se uiga o le upu *sina* i le 1. Samoa 2. Igilisi:

\_\_\_\_\_

\_\_\_\_\_

2. Sa’ili ni upu se 5 e faai’u i le fasiupu *to*

\_\_\_\_\_

\_\_\_\_\_

3. Su’e se upu e 9 mata’itusi ma tusi sona fa’amatalaga:

\_\_\_\_\_

\_\_\_\_\_



4. Tusi uma upu/ fuiupu e ta’i 3-9 mata’itusi, ma o latou soa i le Igilisi (E faitau ai ma upu ta’ua i le 1, 2 & 3)

*Lelei atoa* = 12 upu

*Lelei tele* = 8 upu


*Lelei* = 6 upu

\_\_\_\_\_

**PASO I GAGANA E LUA /18**

Faatumu i upu/igoa Peretania e soa tutusa (va’ai i le fgt.)

Fill crossword with English words/names



©LPSL TAVITA

**Faalava ~ Across**

1 Aso Gafua (6)

4 a’au (4)

8 Aso Fanau (Iesu) (4)



9 **tama pese** ma faitaga (6)

11 filemu (6)

12 ipu

mafolafola

telē ave ai

mea’ai (4)

14 sooupu: o

le mea lea, o lea (2)

15 iuni malo Europa (2)

16 matua i tausaga (3)

17 tutusa (4)

22 Se pese a le aupaese

Beatles, i se auala (5,4)

25 Roma (4)

26 e le fa’aaogaina (3)

**Lalo ~ Down**

1 Minisita (8)

2 nila su’isu’i (4)

3 e pei (2)

5 salutimu taavale (5)

6 faaipoipo (5)

7 sina moe puupuu (3)

10 Egelani (7)

12 tamatamaivae (3)

13 iloa ai se auala i se aai (3)

18 Paneta Venusi (5)

19 Leai (2)

20 ‘au (ta’alo) (4)

21 Fuafuaga, peleni (4)

23 Faalupega: Foma’i (2)

24 goa Eti (2)

**ARP the Word Builder**

**Rules:**

1. Build as many English words as possible, start with three letter words.
2. Every word you build must include the Alpha Letter (centre).
3. Each letter is used only once, including the Alpha Letter.
4. The class as individuals or groups can play this game. 1 point for one three letter word, 2 for four letter word, 3 for five, and so forth.



**Three letter words**

**Four letter words**

**Five letter words**

**Six –seven letter words**

ADDITIONAL ACTIVITY: Make a list of other words that are spelt without the Alpha Letter E.g. PEN


**SUDOKU ~ TAALOGA I NUMERA**

(sudoku.com)

|   |   |   |   |   |   |   |   |   |
|---|---|---|---|---|---|---|---|---|
| 9 | 2 | 6 |   | 1 | 5 |   |   |   |
| 1 |   | 8 | 7 | 6 | 3 | 9 |   |   |
| 3 |   | 7 | 9 |   |   | 1 | 6 | 5 |
|   |   | 9 |   |   |   |   | 3 | 8 |
| 7 |   |   |   |   |   | 6 |   |   |
|   |   |   | 3 | 9 | 6 |   |   |   |
|   | 7 |   |   |   |   |   | 1 | 6 |
| 6 | 9 | 4 |   |   |   | 7 |   | 2 |
| 5 |   | 3 | 6 |   |   | 4 |   | 9 |

## ~ TAALOGA PASO SAMOA I LE GAGANA SAMOA ~ POTO LAUTELE ~

1. Faatumu le pusa i upu/igoa Samoa poo se tasi e faatonuina.
2. E maua le faailoga \$100 mo sē e mua'i faatumua le paso i lona sa'o atoatoa.
3. E leai se tasi na maua le faatulagaga sa'o o le paso lomiga 1 2024.



Copyright LPSL Tavita 2024

### FAALAVA ~ ACROSS

1. toe faalelei, fonofono (6)
4. se itumalo aiga sa Malietoā (9)
9. se laau fua mumu (6)
15. faamatala ai galuega o loo gasolo ai Samoa i fafo (11)
16. Pese: \_ means too much talk (11)
17. Se suafa sa'o tama'ita'i a o se matai foi i Solosolo (3)
18. Tino: ivi e pipii i ai ivi 'aso'aso (11)
24. Fuiupu: \_ i luma (6)
25. se mea ua sese ai (4)
26. fufulu a'a o le masoā (2)
28. ta'u ai ni falelotu tetele (8)
32. Taaloga: se fasi laau e lia'i (3)
33. Talatuu: O le a na fuli e Tuna ma Fata ma fe'e i Safotu? (3)
35. Igoa a'oga faafaife'au EFKS (5)
36. kiki (2)
37. Faama'i o lauulu o tamaiti (3)

38. So'ona 'ote i se tamaitiiti (2)
40. Igoa o se fautasi mai Manono (9)
41. Faalafi se mea (2)
42. Faamasinoga Maualuga: suafa matai o se faamasino sinia: Clarence Nelson (3)
43. Upu o lauga: taotoga o tuugamau (6)
44. Upu masani: O le \_ i aso uma (2)
46. tafao vale (3)
47. tofu le faasoā (2)
49. Itula o le aso ua te'a atu (8)
50. Vaolia Samoa: E le mau le \_ (3)
52. Vaolia Samoa: Ua \_ le pologa (2)
54. Mea tau su'esu'ega: Se auala e ao ai faamatalaga (7)
57. Atu Samoa: se motu sasa'e mamao (3)
59. Vaolia Samoa: sau i le \_ (2)
60. TV: Polokalame o le lotu Samoa aoao (7,4)
61. Leo sa'o: Sau i le oge/ one (3)
62. Ta'u puupuu o le Alefapeta Samoa (2)

64. Upu o 'ava: Ua \_ vai ae suamalie 'ava (3)

67. O fuiupu e tautu i ai se Gagana poo se nuu e fa'aagogaina (6)

71. Se isi upu e tutusa ma le faalua (6)

72. se 'ula taatele i alii (7)

76. igoa o se aitu Samoa ta'uta'ua (4)

77. Kalama: si'uupu iloa ai se nauna (2)

78. meatotino a se kamupani (5)

81. Pipii faatasi vaa i le sami (6)

84. mafatia tele (7)

90. meafaigaluega ta tatau (2)

91. Taimi: faailo le tuana'i (2)

92. Alalafaga tua'oi ma Satuiatua (8)

93. Ma isi ua le ta'ua i le saunoaga (6)

94. Talatuu: \_ Tuna ma Fata (7)

95. Laofie ma lagilelei le aso (2)

96. Tusi Paia: upu fafine e le fanau (2)

97. feala mai i le taeao (6)

98. Tu le la ae a le logo? (2)

99. O se patele iloga sa nofo i Apia (5)

102. Igoa o se kamupani pasi (7)

104. se fofo o le ma'i (3)

105. igoa o se i'a (3)

106. faa-Samoa o le 'hundredweight' 100

pauna Amerika, ae 112 Peretania (9)

107. Afioga o le ao Gatoaitale (5)

108. Tala a tamaiti: Le alii e 40 lana

vaega gaoui (7)

### LALO ~ DOWN

1. Aganuu: o e leoina se tupu (5)

2. se la'au e 'aina ona fua (5)

3. Manu Samoa tuai: Sene ? (5)



5. 'Ava fai i le sua o le vine (5)



PASO SAMOA TAALOGA MAUA LE TAU TUPE \$100

- 6. Taua: Se 'a'upega mata'utia (5)
- 7. Se alalafaga i Falealili (6)
- 8. Se meaola i vaega fetolofi (7)
- 10. Tusi Paia: le ala ta'uta'ua na auai Iesu Toe Tu ma ni ona soo ae le iloa o ia (4)
- 11. Faauma le upu: E au le \_ (7,1,4)
- 12. O le ala e faatino ai le fe'au (6)
- 13. Alagaupu: Ua \_ tupe i le fafao (4)
- 14. Tala a tamaiti: o se tagata tino ese (5)
- 19. Faia'oga/tusitala a o soifua: Unasa Leulu Felise \_ (3)
- 20. sauni atu i se faamoemoe (3)
- 21. pa'epa'e (se isi upu) (3)
- 22. Se suafa matai i Lano (3)
- 23. Taunuu le vaa ma taula (4)
- 26. se isi ta'u o le solofanua Tusi Paia (6)
- 27. upuia se tagata (se isi upu) (10)
- 28. Se kolisi i Faasaleleaga (4,2,4)
- 28. Galuega a Iesu i e o leiloa (6)
- 30. upu o lauga: Tatou \_ ia i lou finagalo (4,1,4)
- 31. Faa-Samoa le Lano's challenge (3,1,4)
- 33. te'a atu (5)
- 34. lofia se nuu e se matagi (4)
- 36. Pese/Tusi: i talaatu o \_ (3)
- 39. galuega fai o le aso (8)
- 45. igoa o se la'au faivai (2)
- 48. ua gata ai vevesi o taua (3)
- 51. Aganuu: se malaefono Satupaitea (7)
- 53. Anava NUS: Ia a Samoa? (2)
- 55. Tusi Paia: Ioane 3. E \_ le matagi i le mea e loto i ai (3)
- 56. Igoa o se malo i Europa, o lona laumua o Roma (6)
- 58. Iagona masalosalo tamaloa (3)
- 63. ave ese ma'a mai talo vela (2)
- 64. Alalua se lala o se laau, poo se auala (4)
- 65. Upu a Sagato Paulo: Ua \_ ia te a'u le tausinioga (2)
- 66. tamaoaiga (se isi upu tutusa) (2)
- 68. Faatonuga: i a'oga siva (3)
- 69. to'alua o le tamaloa (3)
- 70. Ua sili atu i le taimi faigaluega (3)
- 73. se laau mumu ona fatu (3)
- 74. upu fou: sa'o, tonu (3)
- 75. Ta'u a Hawaii i le 'ula fugalaau (3)
- 79. Se suafa ta tatau lauiloa (7)
- 80. Pese Penina o Tiafau: La'u tifa i moana, la'u \_ le fili o tama (7)
- 81. Ua lelei se fua mo le taumafa (4)
- 82. Tusi Paia: Ta'ita'i'au a Tavita (5)
- 83. se tama'i lavea (tosi) i le tino) (5)
- 84. se alalafaga tuuta Salafai (7)
- 85. galulolo (iloa foi i le sunami) (7)
- 86. O Samoa e le o se nuu \_ (7)
- 87. Faafeagai o Auamanu (7)
- 88. le aso ua aga'i ina vevela (6)
- 89. Talatuu: se tasi atalii o Pili (3)
- 95. maua pea le malosi e faauma ai se fe'au, pe fai se isi fe'au (4)
- 99. Se tasi Malietoa i le talafaasolo o Samoa (3)
- 100. Lakapi 7: ta'u ai se malae o se nuu e faasolo ai le taamilosaga (3)
- 101. Suinauna Peresona: O a'u, O oe, \_ (1,2)
- 103. Aisea ua tulei ai le taavale? (2)

SOLO

Laurence Binyon *For the Fallen*

Liliuina LPSL Tavita

Mo e na to'ele!

Pāu le ta'alili a talipalau; Oti e toa ma mamalu,  
E auē fa'anoanoa i atulagi o le vavau.  
O iai pesega i totonu o le fa'atafunaga  
Ma le viiga e pupula i o tatou loimata.

Na latou o ma pese i le taua, e talavou, Ausa'ō, mautonu, lotomau ma taufiafia. Na ma'elegā e tau i le i'uga fa'asaga i fita le mafaitaulia; na to'ele ma o latou foliga fa'asaga i le fili.

E le toea'iina i latou, fa'apei o i tatou o totoe e au ina matutua:  
E le satia i latou e augatausaga, pe ta'usalaina e le taimi.  
I le goto ifo o le la ma i le taeao,  
Tatou te manatua i latou.

Fa'apei o fetu e fepulafi pe a liua i tatou ma efuefu,  
E savavali gasolo ane i luga o laufanua fa'alelagi;  
Fa'apei o ni fetu ta'iala i taimi o o tatou puapuaga,  
E tumau, e tumau e tau i le i'uga.


TALI PASO SAMOA LOMIGA 1 2024

|   |   |   |   |   |   |   |   |   |   |   |   |   |   |   |   |   |   |   |   |   |
|---|---|---|---|---|---|---|---|---|---|---|---|---|---|---|---|---|---|---|---|---|
| S | A | I | N | A | M | A | I | E | S | E | T | E | T | E | T | A | U | F | A | U |
| A | N | M | A | S | E | A | A | T | L | A | T | L | A | T | L | A | T | L | A | T |
| L | U | A | F | A | T | A | S | A | G | A | F | A | A | L | A | V | A | L | A | V |
| E | I | S | L | S | N | O | O | V | N | I | P | G | A | L | A | V | A | L | A | V |
| F | A | L | E | O | P | O | M | A | A | O | L | A | A | L | O | A | L | A | O | A |
| U | A | N | N | E | A | T | A | L | A | S | P | L | A | L | O | A | L | A | O | A |
| A | U | T | E | V | A | O | A | M | E | I | M | A | T | A | I | O | A | L | A | O |
| F | O | A | T | A | L | O | L | O | A | N | O | T | L | L | A | O | L | A | O | A |
| A | U | A | U | N | A | G | A | O | I | E | L | I | S | A | U | A | N | O | A | L |
| L | T | A | A | T | O | A | U | L | A | T | U | U | G | T | A | L | O | L | A | O |
| E | M | O | M | A | I | T | A | I | U | I | A | I | P | A | T | I | N | O | A | L |
| U | M | M | A | U | A | M | T | A | S | U | A | A | O | A | L | O | L | A | O | A |
| M | A | I | M | A | I | A | I | T | A | G | I | A | E | A | L | O | F | A | L | O |
| A | K | N | I | M | O | A | L | P | S | U | A | I | O | A | L | O | F | A | L | O |
| U | L | A | P | U | A | O | T | O | O | M | A | G | A | T | O | A | L | U | A | L |
| T | O | F | A | N | U | A | A | U | F | A | O | L | T | A | L | O | F | A | L | O |
| U | O | S | I | L | I | T | O | F | I | L | A | U | A | M | O | T | A | L | O | F |
| A | A | A | T | A | A | U | A | N | A | U | A | O | A | L | O | F | A | L | O | F |
| G | A | T | A | I | V | A | I | U | T | A | I | V | E | P | A | U | L | I | A | L |
| I | U | L | E | M | E | R | A | E | A | I | N | A | L | O | F | A | L | O | F | A |
| A | T | A | M | A | I | T | A | G | I | L | E | A | T | U | N | U | P | E | L | E |
| G | L | I | E | U | O | N | I | U | E | I | A | L | O | F | A | L | O | F | A | L |
| I | N | A | I | S | E | G | I | A | F | E | T | A | U | S | U | A | V | A | L | O |

TALI PASO 1—LUA GAGANA

|   |   |   |   |   |   |   |   |   |   |
|---|---|---|---|---|---|---|---|---|---|
| P | R | A | I | S | E | A | M | O | R |
| H | U | O | F | A | O | A | L | O | A |
| A | N | T | I | C | O | L | O | N | Y |
| N | O | E | O | R | A | A | L | O | A |
| T | O | L | A | N | D | F | I | L | L |
| O | B | I | E | A | O | A | L | O | A |
| M | P | S | T | A | N | D | A | R | D |
| M | A | T | R | E | D | A | L | O | A |
| A | M | O | B | B | E | T | A | L | O |
| S | N | O | W | H | I | T | E | O | A |
| S | K | N | T | D | O | E | A | L | O |

©LPSL Tavita 2024



O LE TALA MO TAMAITI

# O LE TAMALOA MA LONA ATALII MA LE ASINI



**S**A iai se tamaloa faifa'atoaga ma lona atalii e nonofo i uta i le vao. E telē le la fa'ato'aga o meleni, pi, kuava, kapisi ma kukama. E tausi fo'i a la moa, pua'a, o se povi, se 'oti, ma se asini.

Ua o'o i le tasi aso ona fai atu lea o le tamaloa i lona atalii, "Alu e aumai le asini la e ta'a i le fanua. E tatau ona ta o i le aai e fai mai se ta fa'atau a o le i o'o mai le taumalulu."

Ona alu lea o le atalii ua ta'ita'i mai le asini. Ua fai e le tamaloa lona fa'agutu, ona tu'u lea i luga o lona tua se pea taga. O le pea taga e aumai ai le la fa'atau.

Ua alu nei le solo i le aai, o le asini e pito i luma, o le atalii e pito atu i ai, ma le tamaloa e mulimuli mai tua.

E le i leva lava ona o ae fetau ma ni tamaiti d'oga o lo'o savavali mai. Na iloa mai e tamaiti le solo ona taliē lea. Ua fa'apea le tala a le isi tama, "Se'i va'ai fo'i la i le solo lala e sau. Ai e le fia ti'eti'e i le asini."

Ae fa'apea mai le tala a le isi tama, "Ailoga e iloa ti'eti'e!" Ona o lava lea o tamaiti ma taliē leotetele. A o le tamaloa ua ita, auā na ia lagona atu le talanoaga a tamaiti. E le sa'o lea tala sa fai, o la'ua e le iloa ti'eti'e asini. Ona fa'apea a lea o si ana upu, "Tamaiti valea!" ma fai atu loa i lona atalii e oso i luga o le asini.

E toe amata le la savaliga ae lagona atu loa ni leo o ni tagata. O pulenuu a le malo, e ti'eti'e mai i solofanua. Ua latou iloa mai le solo o lo'o aga'i atu ona atili ai lea ona pisa ma taliē.

Ua 'ata le pulenuu lapo'a ma fa'apea lana upu, "Ou te le taliā ni tamaiti faapea i lo'u

nuu. Leaga le faiga."

Ae tali atu le pulenuu faatinoiti, "Ailoga o sona atalii, 'ai le tamaloa o se pologa a le aiga o le tamaitiiti."

Ona o lava lea o pulenuu ma taliē, a o le tamaloa ua ita lava. Fa'apea lana upu, "Pulenuu valelea!" ma tago atu loa si'i ifo i lalo lona atalii ae oso ia i luga.

Ua toe fa'aaau le malaga, ma e le i leva lava ae va'aia loa se solo a ni fafine se to'atolu o lo'o savavali mai.

"Talofa lau susuga, a fa'apefea lena malaga? O le fa'atalofa lea a fafine.

"Si o'u alofa, malo fo'i le soifua," o le tali lea a le tamaloa i fafine.

"E tusa i le fa'afesili, ma te fia o atu ma si o'u atalii i le aai e fai se ma fa'atau."

Ua tutū fafine ma tilotilo atu i le atalii o lo'o savali tusa'e ua vaivai lava. Ona fa'apea lea le tala a le isi, "Oi, se'i va'ai, e ma'i si tamaitiiti, ae a pe a se'i avatu la te ti'eti'e faatasi." Ae faapea a le tala a le isi, Pei a e ma'i fo'i ma si tamaloa." Ona o lava lea o fafine ma talanoa musumusu.

A o le tamaloa ua le taofiofia lona ita. Ua oso nei i lalo ma tomumu, "E le ma'i lo'u atalii! Ou te le ma'i! O outou na e mama'il!" A o lona atalii ua tatu ona vae ma vald'au, "Ou te le toe fia ti'eti'e i se asini ma'i."

Ae e lei lagona mai se upu e fafine.

Ona tomumu lava lea o le tamaloa, "Fafine vālea, e le iloa lava e latou ni mea!"

Ona fa'apea lea o le manatu o le tamaloa, o le a sili ona la ti'eti'e uma i le asini, atonu e le toe faitio mai ai se isi. Ona ti'eti'e uma lea o le tamaloa ma lona atalii ma toe fa'aaau le malaga.

Ua o'o i le aai ma fai loa la la fa'atau. Ua teu i le pea taga, ua fa'ainu fo'i le la asini

ma sauni e toe fo'i. Ua fai la la tonu e ti'eti'e feauaua'i. Muamua le tamaloa. Ua faapea ona fai.

E le i leva ona te'a ese ma le aai ae toe fetau ma tamaiti ia sa latou fetau muamua. Ua fepasia'i ae fa'apea a le tala a tamaiti, "Ua iloa e le tamaloa ti'eti'e."

Ae tali mai le isi tama, "E le iloa pe na a'oa'o e lona atalii." Ua toe tiga fo'i le loto o le tamaloa, ma fa'apea lana tala, "Tamaiti valelea, poo fea e o mai ai!"

E le i leva ae toe fetau ma le solo a pulenuu, ua fo'i mai. Ua fepasia'i ae fa'apea le tala a le pulenuu lapo'a, "Le la tonu la ua sa'o! Pau la'u pona, e laitiiti le asini ae lapo'a le alii, manaia pe 'ana se solofanua."

Ae fa'apea mai le isi ana tama, "Ia, ailoga na te mafaia se tau o se solofanua!" Ua ita lava le tamaloa ma fa'apea fo'i lana upu, "Pulenuu valelea, tou te le iloa lava e outou se mea!"

Ua toe fa'aaau le malaga. Taimi lea ua ti'eti'e le atalii ae savali le tamaloa. E le i leva lava ae va'aia le solo a fafine ua toe fotua'i mai. Ua tutu fo'i ma fa'atalofa.

"Faafetai o lena ua malosi mai si ou atalii," o le latou tala lea.

E le i toe fa'atali le atalii, ua oso loa i lalo, ma tulei le tasi fafine. Ua pa'ū o ia i totonu o se vaivai. A o le tama ua tauvala'au, 'Fafine valea! Fafine valea!

O le taimi lava lea na fe'emo ai uila, ua pāpā faititili. Ua to'ulu faafuase'i ifo timuga. Na taumafai atu isi fafine e toso ese le tama, ae susulu atu ai ma la'ua i le vaivai. O le tasi na lelea lona sakete ua toe pulou ai.

Ua oso atu fo'i le tamaloa e 'au i lona atalii, ma sulu atu ai fo'i i totonu o le vaivai. O le taimi lava lea na tamomo'e mai ai pua'a a le aai ma lopala fa'atasi ma i latou. O 'i e lopala ai pua'a a le nuu.

A o le asini ua lulu lona ulu, ma faapea si ana upu, 'Fai mai ou te vaivai ma ou valea, a o lea ua ou iloa nei le sa'o, ou te le valea!"

A'oa'oga o le tala:

1. A e taumafai e fa'amalie uma tagata, e uma ane e leai se isi e malie.
2. O le natura lava o tagata o le faitio, ae e te valea ai i lou apoina fua.
3. Soso ese ma vaivai.
4. E sa'o fo'i si asini.

Tala faavae: Isopo (Aesop) tusitala Eleni anamua. Toe faamatala.

MAI LE TUSI A DR GEORGE TURNER (MISI TANA) LILIUNA I LE GAGANA SAMOA E SEMISI MA'IA'I

# O TALITONUGA LOTU A SAMOA ANAMUA

**E**

TALITONU tagata Samoa i le mea ua ta'ua o le agaga po o le atualagi. O le mea lea e taofi tagata e fealua'i solo. O le uiga o le upu

AGA, o le alu atu po o le sau. Ua faaluaina le upu "aga" e faailoa ai ia lea lava mea ua ese mai le tino vaai, ma ua talitonu tagata o le mea lea e faimalaga ese atu mai le tino pe a oti le tagata.

E alu o ia i vaega maualalalo i lalo o le vasa; o lea nofoaga ua ta'ua e tagata o Pulo. Ua faamatalaga o itu o

Falealupo i se tasi mataupu, na tatou tau atu ai i nisi tala o "Sa le fee" e faapea na mafua mai i nuu ma nofoaga e latalata ane i Falealupo.

E itiiti mea ua iloaitino i le ituaiga olaga sa faamoemoe i ai tagata Samoa pe a mavae le ola nei. O le mea lea o le a tatou amata o loa i Le Lotu o lo ua matua taatele i le atunuu uma. Sa faapea se taofi i nisi vaitaimi ua aunoa lava Samoa ma ni ituaiga lotu.

O nisi lava o e na asia muamua leni atunuu ua latou ta'ua ia tagata Samoa, o "Samoa le lolotu ma lē tapua'i." A e a mau umi ma i latou ona mafai lea ona iloa o leni mea moni: ua ola ia tagata i lalo o le pulega a le vao atua. O lekeona i latou, ua mafua lelei; i le ua taua tele ia le faatuatua faatasi ma galuega e faia mo nei atua.

O le manatu o tagata Samoa a fanau le tagata ona i lalo lea o le vaavaaiga a se atua: E talosaga le aiga ina ia fesoasoani mai atua i le o le a fanau mai ma o le atua e feagai tauvalauga o lona igoa ma le fanauga, ia o le atua lena o le ola fou.

Ua talitonu lava ia tagata faapea o nei atua ua uluitino i latou i ni faatinoga vaai. So o se mea la e iloa soo ai ia le atua lea o le a avea ma mea e faaaloogia ma tapua'i i ai. Ua avea lea ia te ia ma tupua ma ua faaeteete lava o ia ina ne'i ona faatiga pe faa'ono'ono i ai.

E iloa e le isi lona atua i le pusi sami, o le isi i le tanifa, o le tasi i le laumei, o le tasi i le pili. Ua faapena lava i i'a eseese o le tai, manulele, manu vaefa, ma mea fetolofi. Ua nonofo ia atua o isi i totonu o figota. Ua sa'oloto so o se tasi e na te 'aina ia le faatinoga o le atua o le isi tagata a ua le faamalosi o ia e tagofia ia le faatinoga o lona atua, aua ua taofi o ia o le oti lava le tau i le faalemigao.

E faapea le taofi e sau ia le atua ma nofo ai i totonu o le tagata na faalemigao ia te ia. Fai mai e tauau ifo le malosi o lea tagata ma o le a faatupu mai lava e le atua lea ia le ma'i i soo se totoga seia oo ina oti ai o ia. O atua nei ua ta'ua o atuafale.

Ua avea le tamā o le aiga ma faitaulaga sili. E sauni e ia le tatalo pu'upu'u i le talisuaga afiafi, e ole atu ai ia puipua i latou mai sala, faama'i, taua, ma le oti. E ta'ita'ia fo'i e ia a latou tausamiga tau le aiga lava latou te fai mo atuafale.

I nei sauniga ua masani ona liligi ifo ia sina faatulu o le ipu'ava e fai ma faasao. E 'aufale -potopoto i latou i le fale tele; ma e manatu tagata uma o lo ua faatasi ai foi ma le atua, e pei ona iai ma lona faatinoga, e pei ona tatou ulua'i ta'ua. Ua le aunoa fo'i le manatu e sau le atua ma ulu i le tamā o le aiga po o se tasi lava o le aiga ma tautala mai ai, e faaali mai



mea e faia e i latou e tafi'esea se mala pe faaolaina se tasi ua fasia.

O nisi aso e ui mai le mana'o faapea ia faia e le aiga ia se paopao mo le atua lea, ma tapui ai mo ia. Ai lava o le a mafai ona feoa'i ai ma fai ai a latou galuega, a e o le a le faamalosi lava se tasi e tete'a ma le vaa na fau faapitoa mo le atua.

O le isi vasega o atua o Samoa e ta'ua o atua o aai po o nuu. E tofua ia nuu uma ma o latou atua ma o e fananau mai i lea nuu ma lea nuu ua nainaia lava e fai ma meatotino a lea atua. Ua masani ona fai le tala a le fafine pe a fanau mai e ia se tamaitiiti, "ua ou maua se tamaitiiti mo ...; ona ta'u ai lea o le igoa o le atua ua manatu i ai o ia. Ua i ai foi se malumalu itiiti ua faapaia mo le atua o lea lava nuu. I nuu ua le i ai se malumalu mau mo le atua, o le a fai lava le faletele e masani ona alofi ai alii ma malumalu. O nisi alalafaga ua i ai lava ia pupuvao sa fai ma malumalu. Sa fai ai iina ia tatalo ma taulaga.

E i ai lava i o latou malumalu ia se mea e taula'i i ai le vaai faatasi ma le mata'u faamaulalo. Ua i totonu o nisi malumalu ia se atigipule tele po o se foafoa, ua [tautau] mai le 'au'au o le fale ma ua nonoa i se 'afa. O le foafoa lea e ili e le atua pe afai ua mana'o o ia e o le nuu e tau. Ua teuina ni ma'a se lua i nisi malumalu. E tuuina ia se mea pei o se ulu o se tagata i totonu o se isi malumalu ma ua faafelele mai ai ia nai fasi ta'afi lauiti. E siitia i luga leni mea i ni laau ma faatu ai i le faitoto'a o le malumalu i aso o sauniga.

A o nisi malumalu ua ta'uta'ua se iputau'ava i se 'afa mai le 'au'au o le fale ma ua fai aga'i i ai tatalo; ua avatu foi i ai ia taulaga. Ua faaogaina foi ia le ipu lea i tautoga; pe a saili e fia iloa se tagata na gaioi ona faasolo

ai lea o tagata ua masalomia i le taulima o le ipu, faatasi ma le upu faapea, "e pei ona ou 'u'uina leni ipu o lo o faapea foi ona tilotilo mai le atua ma auina mai le lipiola pe afai na ou gaioia le mea o lo ua fesuea'i nei." E faaogaina foi ia ma'a ma atigi figota i lea lava auala e tasi.

E seasea ona natia le upumoni i luma o leni sauniga mata'utia. Ua faatuatua maua'i latou e faapea o se tasi e na te 'u'u le ipu ma tautala pepelo e oti loa lava o ia.

A o alii foi i nisi nuu ua fai i latou ma Faitaulaga; peita'i ua masani lava ona i ai ia se tasi i se ituaiga ua fai o ia ma lē e faaali mai i tagata ia le mea e mana'o ai le atua. E sosolo ia lea tofi i le gafa. E faatatauina e ia ia aso e pa'ū i ai ia tausamiga mo atua ia, talia ia taulaga ma faafetai i tagata na latou aumaia. O ia foi lea e a ia le tomai e filifili ai pe tatau ona o atu tagata e tau. Sa faia ia taulaga e tele i mea'ai vela. E tuuina le 'ava mua mo atua. A le sasaina i le elele le ipu, e asu faamalele i le lagi.

E taute ia alii uma lava faasolo i le ipu e tasi, faatatau i o latou tulaga. A uma lea ona la'u mai ai lea o mea'ai na saunia mo le atua ua fai ai le 'ava o alii i luma o lo latou atua. E faatasi i le tausaga ona faia leni tausamiga ma e masani ona pa'ū i le masina ua ta'ua nei o Me. Ua le matua iloga i nisi nuu ia ia faiga'ai; a ua matua aloa'ia tele i isi lava nuu. E feaoa e taaloga, fagatuaga, poula, ma isi fiafiaga ma e asoa nei mea. E faatonuina e faitaulaga ia tausamiga faapitoa i ona po o sauaga. E le 'a'ai ia fafine ma tamaiti i aiga nei e faia i taulaga, auā e le o i latou i taua. E talitonu i latou o se tasi e 'ai i se mea e totoe mai i nei faiga'ai a e le alu i le taua o le a opoia e ma'i ma vave ona oti, o lea ua matua faaeteete i latou e tanu mea'ai e totoe o taulaga i aiga faapea.

Ua avea le oo mai o se manulele ua faatino le atua lea i le nuu ma amataga o se tausamiga ia te ia. So o se aso e iloa ai le manu lea i le aai o le aso foi lea e manatu ai le faitaulaga e tofofi se aso mo le tausamiga mo le atua lea.

A o atua o nuu, ua tusa lava o atuafale auā ua tofua lava i latou ma faatinoga totino: ua faaali le isi i le pe'a, a o le tasi i le matu'u, ma le tasi i le lulu. A tau mai se tagata i se lulu mate i le auala, a faapea foi o le faatinoga la lea o lona atua, ona nofo ai lea o ia i lalo ma tagi ma fetu'i lona ulu i ma'a seia tafe mai lava le toto. Ua taofi latou o se mea viia leni i le vaai a le atua.


E ta'ui lelele le manu ma fai i ai le faaloalo e tusa o le tanuga o se tagata. A ua le oti ia le atua i le mate o lona faatinoga. O lo ua ola o ia i isi lulu o lo o i ai le manava ola. E i ai uiga o feleleiga a manu nei i aso o taua. A lele le manu nei i luma o 'au ona aga'i atu ai lea o i latou i luma e tau.

Peita'i a sosopo le 'au e le lulu, o se faailoga mamala lea ma o le a toe solomuli le 'autau. Ua iloa e nisi lo latou atua i le nuanua, a o nisi ua i le fetulele; a oo i aso o taua ua matua mata'ia le tulaga o le nuanua faapea ma le itulagi e lele i ai le fetulele, auā e tuā.

Ua fai le fefevavale o i latou i atua faapea ma le faitogafiti poto o le 'au faitaulaga matape'ape'a, ma mea na avea ai aga faapaupau a Samoa ma amo mamafatū.



# PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: Thomas Jefferson

Aso Fanau: 13 Aperila 1743

Ausiga: Iaulioa i le tusiga o le faavae o le Malo Amerika

Fetu: Arisi

“Ua matou talia nei mea moni o ni mautinoaga: na faia ia tutusa tagata uma; na fo'aiina i ai e lo latou Mataisau ni aia tumau, e aofia i nei le OLA, SA'OLOTOGA ma le SAILIGA O LE LOTO FIAFIA.” O se faaSamoa lena o nisi o upu lausilafia i le gagana Peretania, le upu tomua o le Faavae o le malo o Amerika. Silafia e le lalolagi, o Thomas Jefferson e ana upu, o ia foi le Tusitala Muamua i le lisi o i latou na galulue i le tuufaatasia. E iloga Jefferson i ta'ita'i o le malo Amerika. Ua ta'ua o se alii o taleni e tele. O se faipule sa peresitene, sui peresitene; sa galue foi o le failautusi a le malo; o se loia. O se pule faato'aga, e tele ona tomai i le tausiga o laau, potu i le matematika, le tusia o fausaga o fale ma masini, o se alii o gagana, a'oga i ni gagana se tolu ma tusi-tusi ai e faaopopo i le Igilisi, o se tusiupu o le tala faasolo, o se faitofa e iloga foi. Peita'i ua iloga ma tuese sona sao mo lona atunuu i ona pulega ma upufai. I lana nofoaiga na faatau ai Louisiana ma New Orleans mai ia Farani, e faaopopo i le iuni; o se faaiuga taua tele

Ua ta'ua Jefferson o le fofoga mua o talitonuga temokarasi ma le mau faa-ripapelika i le lalolagi, e pei ona manino i upu tomua o le faavae. O Amerika le malo ua sili le taunapa i aia tatau tutusa, le sa'olotoga o le tagata i soo se mea e fai, e mafua ai ona apo gofie faiga faapisinisi e faasa'oloto ona fai. Amerika o se malo e faatau le sailiga o le loto fiafia, e iai ona le feaiaa'i le lotu ma le malo. Ui e lei atoa tino o le upu a Jefferson, pe a taga'i i le tala o leni nuu, ma mea tutupu, a ua iai le sulu faasino ala e taula'i i ai le vaai a ona tagata. E avea pea ma sini maua e fia ausia.

### ATI GAGANA:

**ripapelika** (nauna) faigamalo faaperesitene, e ese mai faigamalo e ta'ita'ia e se tupu; republic

**peresitene** (nauna) ta'ita'i o faigamalo faaperesitene; ta'ita'i o se faalapotopotoga. Igilisi president.

### Tulimanu o Pola:



E mua pea la'u faafetai i le Tamā i le lagi, i lou soifua ma so'u malosi ua tatou toe fesilafa'i ai i leni taeao fou. Malo le soifua maua. Ae alo maia, o nai motuga'afa fo'i nei a Pola e faanofogofie ai le faafogoga.

O le mataupu i pili a'oga e le 'alofia i la'u matau, talu ai o se tasi lea o pa faalavelave i le aia tatau a soo se tama ma se teine a'oga e tusa i le faavae o Samoa. I le pito lava i luma o le faavae e iai folafolaga na i le puipua o aia tatau a tagata Samoa uma—e aofia ai le fanau. Tele su'ega tupe telefoni e fau ai atina'e o fale, ae manaia foi pe ana fai ma ni telefoni e totogi ai pili o fanau a'oga.

Ma totogi ai pili o nai faia'oga o loo naunau e fia faalatele tomai i le iunivesite aoao. Upu moni, e le taitai ona 'a'u totogi o loo maua, ae pei ona molimau le tamaitai o Vela, e le talia e le latou komiti o le miliona lana talosaga. O le upu na fai ane, o la e faigaluega.

Sa ou faitau i le lipoti lea i suiga fou ua sauni le malo fou sofoatasi e faatino mo a'oga i Aotearoa. O le tala masani, poo a lava mea e fai e se faigamalo, e tula'i mai foi le isi vaega, togi i fafo. Lea foi ua toe la'u mai i totonu mea sa togi i fafo e le Leipa; toe tafitafi ma toe faaola. Ona alu ai lava lea o le siva faataamilo. E leai se faipule e afaina ai, ae na o fanau. Aemaise fanau na e le avanoa i ni a'oga lelei ona e taugata pili.

Ma talanoa ma si a'u uo o Filifilimapuapuaga, o lana valoaga, ua lata le aso e tuu atu ai e malo laiti le tiute o a'oga i malo na e tele tupe. Ona latou faafoea lea o a'oga i le atagalue o A'oga Siata e faatamo'e faapisinisi. Ia, na fai si o'u te'i i leni valoaga a le perofeta, ae na ou nofo foi ma manatunatu, pei a e sa'o: Fai mai si o'u atalii sa talanoa le latou vasega i le mea e ta'u o le kelopelausesio. Ia, ou te le iloa pe iai se upu faapena i le tusiupu fou a le komisi.

O loo taumafai lava la'u taaloga o le paso Samoa, mai le lomiga muamua a le OLA. E lima a'u upu ua uma ona faatumu, ae o le lave e fai si o'u vaivai i le talafaasolo. Manatua e lei a'oina se tatou talafaasolo i a'oga. E iai le fesili poo ai Parate, ia, o lo'u a manatu o le kapeteni lea o le vaa sa to'a i Salelologa. Ia, lafo atu i le 'aufaitonu, pe le o le taimi leni e faaofi ane ai lo tatou talafaasolo i le tatou silapasi a'oga maua, avea ma mataupu e a'o e fanau uma, a o lei galo ma leiloa atu ai i auga o telefoni. Ona toe fesilisili lea poo ai tatou.

O le tagata ma lona taimi ma lana tautua ma lona valaauina. E iai le manatu e tautua uma tagata, i soo se faiva ma se tiute, ae taua lo tatou mautinoaga o lo tatou vala'auina. E faapena se lagona o le tama'ita'i faia'oga ia Melegalenuu Ah Sam, faailoa a o soifua. O lana molimau, e lei iai lava se taimi na sui ai lona mafaufau i lona valaauina. O le faatatau o le tala, A iloa lou vala'auina e le Atua i se fe'au, ona faato'a 'anoa lea lona faauigaga. Sa ou faalogologo i le lauga a Tupua, na ia talaina ai le isi tafa loloto o le upu tautua o se taulaga. Tiute e le o se fe'au e faataunuu a o le taulaga e ofoina atu i le Atua na vala'auina oe ma a'u. Se upu ua sala faafo'i mai. Manuia.